

**Razvojna banka Federacije
Bosne i Hercegovine
Predsjednik Uprave**

Broj: 4298-IX/19
Sarajevo, 20.5.2019. godine

Na osnovu člana 64. stav (1) tačka b), člana 70. stav (1), (3) i (6) Zakona o javnim nabavkama ("Službeni glasnik BiH", br. 39/14), člana 8. stav (2) tačka d) Pravilnika o uspostavljanju i radu Komisije za nabavke (Službeni glasnik BiH broj 103/14), preporuke Komisije za nabavke iz Zapisnika o pregledu i ocjeni ponuda broj 4271-IX/19 od 20.5.2019. godine i člana 20. Statuta Razvojne banke Federacije Bosne i Hercegovine, u postupku nabavke robe-servera za potrebe Razvojne banke Federacije BiH, Predsjednik Uprave Razvojne banke Federacije BiH donosi

ODLUKU

**o izboru najpovoljnijeg ponuđača u postupku javne nabavke servera za potrebe
Razvojne banke Federacije BiH**

Član 1.

Prihvata se preporuka Komisije za nabavke iz Zapisnika o pregledu i ocjeni ponuda, broj 4271-IX/19 od 20.5.2019. godine i Ugovor za nabavku servera za potrebe Razvojne banke Federacije BiH dodjeljuje se ponuđaču ProTim d.o.o. Sarajevo, Dobrinjske bolnice 1A, Sarajevo, kao najpovoljnijem ponuđaču u konkurentskom zahtjevu za dostavu ponuda.

Član 2.

Ukupna ponuđena cijena robe iz člana 1. ove odluke, iznosi 17.920,00 KM bez PDV-a, što u konačnici, s uračunatim PDV-om, iznosi 20.966,40 KM.

Član 3.

Po okončanju roka za žalbu, ugovorni organ će s izabranim ponuđačem zaključiti ugovor kojim će regulisati međusobna prava i obaveze.

Član 4.

U skladu sa odredbama člana 70. stav (6) Zakona o javnim nabavkama, ugovorni organ će objaviti ovu odluku na svojoj web stranici www.rbfbih.ba, istovremeno s upućivanjem iste ponuđačima koji su sudjelovali u ovom postupku.

Član 5.

Ova odluka stupa na snagu danom donošenja i dostavlja se ponuđačima koji su sudjelovali u postupku javne nabavke, saglasno članu 71. stav (2) Zakona o javnim nabavkama.

OBRAZLOŽENJE

Odlukom o nabavci i pokretanju postupka javne nabavke servera za potrebe Razvojne banke Federacije BiH broj 3424-IX/19 od 19.4.2019. godine, odobreno je pokretanje postupka predmetne nabavke za potrebe Razvojne banke Federacije BiH. Javna nabavka je provedena putem konkurentskog zahtjeva za dostavu ponuda, a kriterij za dodjelu ugovora je najniža cijena.

Procijenjena vrijednost nabavke iznosi 18.000,00 KM bez PDV-a.

Obavještenje o nabavci predmetne robe objavljeno je na Portalu javnih nabavki dana 25.4.2019. godine, broj obavještenja: 1011-7-1-282-3-14/19.

Tenderska dokumentacija objavljena je zajedno sa navedenim obavještenjem.

Odlukom Ugovornog organa broj 2633-III/19 od 29.3.2019. godine imenovana je Komisija za nabavke Razvojne banke Federacije BiH, a kojom su definisane njene nadležnosti koje uključuju poslove otvaranja, pregleda i ocjene ponuda, te davanje preporuke za odabir najpovoljnijeg ponuđača.

Slijedom navedenog, Komisija za nabavke u okviru svojih nadležnosti i ovlaštenja je provela predmetni postupak nabavke, te o tome sačinila Zapisnik o pregledu i ocjeni ponuda u kojem je utvrđeno da je evidentirano 6 (šest) pravovremeno pristiglih ponuda kako slijedi:

R. Br.	Naziv i sjedište ponuđača	Datum i sat prijema ponude	Cijena ponude bez PDV-a (u KM)	Popust (u KM)	Ukupna cijena ponude bez PDV-a (u KM)	Ukupna cijena ponude s PDV-om (u KM)
1.	Time Code d.o.o. Sarajevo, Tvornička 3, Sarajevo, Ilidža	09.05.2019. u 08:20 h	17.998,00	0,00	17.998,00	21.057,66
2.	R&S d.o.o. Sarajevo, Igmanska b.b. Sarajevo, Vogošća	09.05.2019. u 08:35 h	15.350,72	2.609,62	17.960,34	17.960,34
3.	IMTEC d.o.o. Sarajevo, Bosanski put b.b. Sarajevo, Ilijaš	09.05.2019. u 09:55 h	17.940,00	0,00	17.940,00	20.989,80
4.	PING d.o.o. Sarajevo, Jukićeva 36, Sarajevo	09.05.2019. u 11:20 h	18.000,00	0,00	18.000,00	21.060,00
5.	ProTim d.o.o. Sarajevo, Dobrinjske bolnice 1A Sarajevo	09.05.2019. u 11:35 h	17.990,00	0,00	17.990,00	21.048,30
6.	TELEGROUP d.o.o. Sarajevo, Fra Anđela Zvizdovića 1 Sarajevo	09.05.2019. u 11:55 h	17.999,72	0,00	17.999,72	21.059,67

Na osnovu izvršene analize i ocjene pristiglih ponuda, Komisija je utvrdila sljedeće:

- **ponuda ponuđača Time Code d.o.o. Sarajevo** je prihvatljiva i ispunjava sve zahtjeve i uslove tražene tenderskom dokumentacijom,

- Ponuda ponuđača R&S d.o.o. je neprihvatljiva iz sljedećeg razloga:

Ponuđač je pogrešno postupio u Aneksu VI tenderske dokumentacije – Obrascu za cijenu ponude-robe i u rubrici za koju je predviđen popust unio je iznos PDV-a, tako da mu je ukupna cijena s popustom bez PDV-a veća od ukupna cijene bez PDV-a.

U Aneksu VI tenderske dokumentacije – obrazac za cijenu ponude-robe ponuđač je greškom na mjesto predviđeno za iskazivanje popusta naveo vrijednost PDV-a, odnosno naveo je da ukupna cijena bez PDV-a iznosi 15.350,72 KM, popust 2.609,62 KM, te ukupna cijena s popustom bez PDV-a iznosi 17.960,34 KM. Da je ponuđač dao popust u iznosu 2.609,62 KM ukupna cijena s popustom bez PDV-a bi trebalo da bude manja u odnosu na ukupnu cijenu bez PDV-a za iskazani popust.

U Aneksu II – obrazac za ponudu ponuđač je iskazao cijenu bez PDV-a koja iznosi 15.350,72 KM, da popust iznosi 0,00 KM, te da vrijednost PDV-a iznosi 2.609,62 KM, te da ukupna cijena s PDV-om iznosi 17.960,34 KM. Iz Aneksa II se može vidjeti da ponuđač nije ponudio popust. U nacrtu Ugovora cijene su iste kao u Aneksu II.

S obzirom da je stopa PDV-a u BiH 17%, nesporno je da 17% na cijenu 15.350,72 KM daje iznos 2.609,62 KM, te je nesporno je da je ponuđač načinio propust prilikom iskazivanja cijene u obrascu za cijenu ponude.

Obzirom da se radi o grešci koja je učinjena u dijelu ponude kojom se iskazuje cijena ponude, a da je Uputstvom za pripremu modela tenderske dokumentacije i ponuda propisano da se može vršiti samo provjera računске ispravnost ponude, u konkretnom slučaju Komisija za nabavke je stava da se ovo ne može prihvatiti kao računska greška koja se može ispraviti nakon dostavljanja ponude zbog čega nije pozvala ponuđača da izvrši ispravku svoje ponude.

U suprotnom, dovela bi se u pitanje regularnost postupka i jednak tretman prema drugim ponuđačima u postupku javne nabavke, te s toga, a imajući u vidu član 17. Uputstva za pripremu modela tenderske dokumentacije i ponuda, propust se ne može podvesti pod isti kao računska greška, te stoga Komisija nije tražila pojašnjenja i smatra da je ponuda neprihvatljiva.

- **ponuda ponuđača IMTEC d.o.o. Sarajevo** je prihvatljiva i ispunjava sve zahtjeve i uslove tražene tenderskom dokumentacijom,
- **ponuda ponuđača PING d.o.o. Sarajevo** je prihvatljiva i ispunjava sve zahtjeve i uslove tražene tenderskom dokumentacijom,
- **ponuda ponuđača ProTim d.o.o. Sarajevo** je prihvatljiva i ispunjava sve zahtjeve i uslove tražene tenderskom dokumentacijom,

- **ponuda ponuđača TELEGROUP d.o.o. Sarajevo je neprihvatljiva iz sljedećih razloga:**

- *Navedeni ponuđač je uz predmetnu ponudu dostavio izjavu o ispunjenosti uslova iz člana 45. Zakona o javnim nabavkama BiH (Aneks III) i izjavu iz člana 52. Zakona o javnim nabavkama BiH – (Aneks IV) koje nisu ovjerene u skladu sa Zakonom. Naime, u izjavama (Aneks III i Aneks IV) koje se ovjeravaju kod nadležnog organa upisani su podaci odgovornog lica-direktora, koji je izjavu dao, potpisao i na kojoj stoji po opunomoćniku (stoji još jedan potpis bez navođenja imena i prezimena), ovjerene pečatom ponuđača, a koje su po osnovu punomoći broj 166 133 od 12.11.2018. godine ovjerene u Općini Centar Sarajevo od strane drugog lica. Obzirom da izjavu daje ovlašteno lice u pravnom licu to je ponuđač bio dužan u svrhu dokaza o ispunjenosti uslova dostaviti izjavu ovjerenu kod nadležnog organa u formi i na način koji propisuje Agencija podzakonskim aktom. Izjavu o ispunjavanju uslova iz člana 45. Zakona o javnim nabavkama BiH i Izjavu iz člana 52. daje i potpisuje ovlaštena osoba koja predstavlja ponuđača. Takvu izjavu potvrđuje nadležni organ u skladu sa članom 3. Zakona o ovjeravanju potpisa, rukopisa i prepisa (Službeni list SR BiH broj 37/71, 39/85 i 42/89):*

„Za dokaz istinitosti potpisa potrebno je da podnosilac isprave pred ovlaštenim službenim licem svojeručno potpiše ispravu ili da izjavi da je potpis, koji se nalazi na ispravi, njegov potpis. „

Shodno naprijed navedenom, može se nedvojbeno utvrditi da je ponuđač uz ponudu dostavio izjave iz člana 45. i 52. Zakona o javnim nabavkama koje nisu propisno ovjerene od strane nadležnog organa uprave, u smislu da su na obrascu izjave navedeni podaci osobe koja daje i potpisuje izjavu, a koja je ovlaštena za zastupanje ponuđača, uz još jedan potpis (dva potpisa na izjavi) dok je ovjeru kod nadležnog tijela izvršila druga osoba, opunomoćenik, te je prilikom ovjere utvrđen identitet na osnovu lične karte koja se razlikuje od lične karte osobe navedene u samom obrascu izjave.

Napomena: U slučaju da izjavu daje i potpisuje drugo lice u ime ponuđača po punomoći, te kao takvu ovjerava kod organa Uprave, u sastavu ponude potrebno je da se nalazi original ili ovjerena kopija punomoći ukoliko je potpisnik ponude lice ovlašteno po punomoći od strane ovlaštenog zastupnika ponuđača (kako je navedeno u tački 17. tenderske dokumentacije), što se, u konkretnom slučaju nije desilo.

- *U nacrtu ugovora nisu uneseni podaci iz ponude, a što je traženo tačkom 27. tenderske dokumentacije.*

S obzirom da je tenderskom dokumentacijom predviđeno provođenje e-aukcije u skladu sa Pravilnikom o uslovima i načinu korištenja e-aukcije (Službeni glasnik BiH broj 66/16) i njeno trajanje 10 minuta, za ponuđače koji su dostavili prihvatljive ponude zakazana je e-aukcija za ponedjeljak, 20.5.2019. godine sa početkom u 11:00 h.

Rangiranje prihvatljivih ponuda prema kriteriju za izbor ponude nakon provedene e-aukcije:

R. Br.	Ponudač	Ukupna cijena ponude (bez PDV-a) u KM	Rangiranje
1.	ProTim d.o.o. Sarajevo	17.920,00	1
2.	IMTEC d.o.o. Sarajevo	17.940,00	2
3.	Time Code d.o.o. Sarajevo	17.998,00	3
4.	PING d.o.o. Sarajevo	18.000,00	4

U postupku donošenja ove odluke posebno su cijenjene činjenice da je Komisija za nabavke pravilno i potpuno izvršila ocjenu kvalificiranosti ponuđača, te pregled i ocjenu ponuda, u skladu sa kriterijima i uslovima iz tenderske dokumentacije.

Imajući u vidu sve prethodno navedeno, a prvenstveno da je ponuda ponuđača ProTim d.o.o. Sarajevo u iznosu 17.920,00 KM bez PDV-a, nakon provedene e-aukcije, prema kriteriju za izbor ponude (najniža cijena) ocijenjena najpovoljnijom, te ispunjava uslove i zahtjeve predviđene konkurentskim zahtjevom za dostavu ponuda, primjenom člana 64. Zakona o javnim nabavkama stav (1) tačka b) i člana 70. stav (1), (3) i (6) Zakona o javnim nabavkama ("Službeni glasnik BiH", br. 39/14) odlučeno je kao u dispozitivu ove odluke.

Pouka o pravnom lijeku: Protiv ove Odluke može se izjaviti žalba u roku od 5 (pet) dana od dana prijema ove Odluke, saglasno članu 97. 99. i 101. Zakona. Žalba se podnosi u najmanje 3 (tri) primjerka.



Predsjednik Uprave

Salko Selman

Dostaviti:

- Učesnicima u postupku